



# Menteri mentor lancar koperasi UMP

Menteri Perdagangan Dalam Negeri, Koperasi dan Kepenggunaan, Yang Berhormat Dato' Sri Ismail Sabri Yaakob yang juga Menteri Mentor Universiti Malaysia Pahang (UMP) telah melancarkan Koperasi UMP Berhad dan kedai buku KOOP UMP.

Dengan wujudnya Koperasi UMP Berhad ini ianya sebagai koperasi tunggal yang menyatukan warga kerja dan mahasiswa universiti ini dengan merangka satu pelan perniagaan yang memberi keuntungan jangka panjang untuk dinikmati ahlinya dan memberi manfaat kepada seluruh warga UMP.

Menurut Dato' Sri Ismail Sabri sehingga akhir Januari 2012, koperasi yang berdaftar di Malaysia adalah sebanyak 9,141 buah dengan 690 pendaftaran di Pahang sahaja.

Katanya, jika sekitar tahun 2009, koperasi hanya menyumbang satu peratus daripada keluaran dalam negara kasar (KDNK), dengan penambahan bilangan koperasi yang berdaftar sasaran peningkatan sebanyak lima peratus KDNK menjelang 2013 akan tercapai.

"Ini jelas membuktikan bahawa peranan

koperasi dalam membantu menjana pendapatan negara tidak boleh dipandang remeh.

"Dasar Koperasi Negara 2002-2010 yang diperkenalkan kerajaan memberi perkembangan kepada pengurusan koperasi agar lebih sistematik dengan melaksanakan program-program pembangunan perniagaan, akses kepada sumber pembiayaan, penerapan pembudayaan keusahawanan dan peningkatan dalam pengawal seliaan koperasi," katanya semasa merasmikan Koperasi UMP Berhad dan Kedai Buku KOOP di Dataran Canseleri UMP Gambang pada 10 Mac 2012 yang lalu.

Dato' Sri Ismail turut mengumumkan geran peruntukan sebanyak RM30 ribu kepada Koperasi UMP Berhad dan RM30 ribu lagi diberikan kepada Gerakan Pengguna Siswa UMP berdasarkan projek yang dikemukakan mahasiswa.

Menurutnya lagi, gerakan ini berperanan memberi kesedaran dan pengetahuan kepenggunaan di kalangan pelajar, ibu bapa dan orang luar agar tidak mudah tertipu dan

berhemat dalam berbelanja.

Naib Canselor UMP, Profesor Dato' Dr. Daing Nasir Ibrahim berkata, sejak penubuhan universiti ini 10 tahun yang lalu, beberapa percubaan telah dibuat oleh kalangan warga staf dan mahasiswa yang berminat untuk menubuhkan koperasi di sini.

"Berkat permuafakatan yang bersendikan kesatuan minda dan kesatuan tindakan warga universiti ini, maka Koperasi UMP Berhad yang dirintis sebelum ini berjaya direalisasikan.

"Kedai Buku Koop UMP yang bakal dilancarkan sebentar lagi merupakan inisiatif awal yang mencerminkan komitmen Koperasi UMP Berhad untuk memberi impak yang signifikan kepada kebajikan dan keperluan warga UMP secara keseluruhannya," katanya semasa menyampaikan ucapan.

Menurut beliau, pihak pengurusan UMP melihat perkembangan ini dengan positif, hususnya dalam kerangka pelaksanaan Pelan Strategik UMP 2011-2015 yang melibatkan empat Bidang Keberhasilan Utama Universiti (UKRA).